

25 FEB 2003

NAM: DR MAHATHIR TEMUI KHATAMI DAN PEMIMPIN LAIN PADA SIDANG NAM

KUALA LUMPUR, 25 Feb (Bernama) -- Perdana Menteri Datuk Seri Dr Mahathir Mohamad hari ini mengadakan perbincangan dengan para pemimpin dan menteri termasuk Presiden Iran Seyed Mohammad Khatami pada hari terakhir Sidang Kemuncak NAM ke-13 di sini.

Dr Mahathir, pengerusi NAM yang baru dilantik bagi tempoh tiga tahun, memulakan beberapa siri perbincangan dengan Presiden Somalia Abdikassim Salad Hassan diikuti Presiden Djibouti Ismael Omar Guelleh, Presiden Festus Gontebanye Mogae dari Botswana, Presiden Levy Patrick Mwanawasa dari Zambia, Presiden Cuba Fidel Castro dan Perdana Menteri Qatar Sheikh Abdulla Khalifa Al-Thani.

Pemimpin lain yang tidak melepaskan kesempatan untuk bertukar-tukar pandangan dengan pemimpin Malaysia itu ialah Perdana Menteri Guinea Lamine Sidime dan rakan sejawatannya dari Mongolia Nambaryn Enkhbayar.

Pusingan seterusnya perbincangan membabitkan Presiden Amadou Toumani dari Mali, Wakil Peribadi Emir Kuwait, Sheikh Sabah Al-Ahmad Al-Jabar Al-Sabah, Naib Presiden Sudan Ali Othman Mohammed Taha dan Perdana Menteri Mauritius Sir Anerood Jugnauth.

Yang lain-lainnya ialah Pemerintah Fujeirah dan Majlis Tertinggi Emiriyah Arab Bersatu, Sheikh Hamad Mohammed Al-Sharqi, Menteri Luar Peru Allan Wagner Tizon, Ketua Staf kepada Setiausaha Agung Pertubuhan Bangsa-Bangsa Bersatu Iqbal Reza, Presiden Namibia Dr Samuel Danial Nujoma dan Presiden Gabon El Hadj Omar Bongo.

-- BERNAMA

SR AZH NM MAM ROS